

## Taitus

<sup>1</sup> Aya Pol, Negur nē ferfer, Jesus Kristus nē aposel, Negur igirnēdin neid momooya nigin ado, momoi nē keleī uyu irou di, idi fateul bagai dibodōf nigin, igirnan,

<sup>2</sup> momooya ado keleī anī, mata faimud ibodkeleya nē wau iseya bun ibodok, mata faimud ibodkeleya anī nigin Negur ī to idegēdig, fau sain gariya inoya sā mog, wau kuturol fen, promis od iron.

<sup>3</sup> Agef fen, yagon sain bun bagai, Negur neda Isennadaya ī irō di, aya biya od wogōya kabī ifanan anī bunem wogō au di, in od yaoren,

<sup>4</sup> Taitus, neu kesu bagai, ada momooya tekelei ado õ bun pas enei atotof:

Negur Tamada ado Kristus Jesus neda Isenna-daya neid wau ifenēya ado wau inosiya õ bun ibodōf.

### *Taitus Nē Kabī Oun Krit Nuyo*

<sup>5</sup> Aya Krit nuyo an atornon anī nē gariya are, ereb bure felediya san anī madur woid fen, taun ganan bun uyu irouya, aya õ orokonon gen ugirnēdiyouf nigin.

<sup>6</sup> Uyu irouya are ī bouwa od sā, kayau tekelei aiwa, tamo ī ne gere tar momooya ado, tetēya, idodōya sā.

<sup>7</sup> Sios lo fiya tamo ī, Negur nē kabī ifenēya nigin, ī bouwa od sā, to aya dogol yedig, kaisā to name

iseldig, aai fatuk to yōdig, to kusī yedig, idegēya bunem safina to yaledig.

<sup>8</sup> Agef mā, ī tamo yaledig, ereb biya nigin wau laa fedig, ī kisi biya ado ibodōdig, madur, fateul, ī yogo nigin biya kulatun fedig.

<sup>9</sup> ī momooya od difelnen anī irou kafī falauf, anī bunem, ī sā tunī keleī biya bunem waud yalesauf, agef fen, ī idi keleī biya od nigin kiwai dinon anidi faded fiyēdiyouf bagai.

<sup>10</sup> Ere nigin, an idodōya tamo, od kaū sā, idegēya temeleid musei difaref, idi atun mulū bun temeleid anidim age difedig bagai.

<sup>11</sup> Idi sigoreid ufofāf, ere nigin, idi idegēya bunem safina yaleya nigin to ifelnēya nē anī difelneid fen, fō fō adok daū difedif.

<sup>12</sup> Idi neid fonō profet taka eig ye iron, “Krit tamo kayau idi faimud idegēya temeleid, gaar kuī sane gen, fō temeleid saaf weweneid.”

<sup>13</sup> Od enei are momoi. Anī nigin, totol od urokeneid, ou wiyēdiyouf, ago di, anī idi neid momooya biyauf,

<sup>14</sup> anī bunem, idi Juda neid nenerī kaū sā to karī douf, age de fen, idi momoi nē anī ditoron anidi neid od to dō difouf.

<sup>15</sup> Karē bun temeleid bun, ereb ereb ganan karē, anī ere, idi amuyē kisi ado momooya sā anidi bun, karē taka sā. Momoi, idi neid waud ado kisi es fiya sane len.

<sup>16</sup> Idi Negur keleī dedig, anī ere, nedī tobounueid bun, idi Negur nigin wa difedig. Idi sane bagai, idodōya temeleid, idi ereb biya age fiya nigin kisi feleya sā.

## 2

*Ereb Mala Fire Fire Ifelnēdiyauf*

<sup>1</sup> Ō ereb biya od wogō yef anī kilei ufelnēdiyouf.

<sup>2</sup> Tamo biyeid dogo nigin biya kulatun difouf nigin, idi anī karī difiyēdiyouf nigin, idi kisi biya ado dibodōf nigin ado, momoya, waud laa fiya ado, feseya sā ifareya bun madur dibodōf nigin ufelnēdiyouf bagai.

<sup>3</sup> Age fiya bagai, kayau biyeideg karī del dibodōf nigin, taka dumen od to dirōf nigin, wain fatuk bagai to dāf nigin, agef fen, ereb biya anī difelnēdiyouf nigin ufelneid.

<sup>4</sup> Ago di, idi, kayau momoul, nedī aiweid tar adodo kesu tar nigin waud laa fouf nigin, tai difediyouf,

<sup>5</sup> idi dogo nigin, sā biya kulatun difouf nigin ado bouweid od sā dibodōf nigin, fō bun kabī dalouf nigin, tobonunā biya age difouf nigin ado, aiweid tar nigin karī difediyouf, age dife di, taka nem Negur nē od to kobu fouf nigin, kayau momoul tai difediyouf.

<sup>6</sup> Age fiya gen bagai, kesu gaū, dogo nigin biya kulatun difouf nigin wedereid urou.

<sup>7</sup> Ereb ereb ganan bun, idi dile fen, dō difouf nigin ereb ereb biya ago. Ogon ifelnēya bun, ō tutuk ifareya, wau adok ifelnēdiya bun ifenēya,

<sup>8</sup> wogō biya tamo to kiwai difenēf nē anī ufelnēdiyouf, ago di, idi kiwai difonok anī mama fediyouf, ere nigin, idi ada nigin ereb sane taka wogōya nigin are sā.

**9** Ferfer, ereb ereb ganan bun, nedī moroid tar karī difediyouf, waud al fiya difenēdiyouf, aiteid to solo difouf,

**10** idi bun tamal bē to dalouf, idi nedī moroid tar nē od dō fiya biya bagai anī difelnēdiyouf nigin ufelnēdiyouf, age dife di, naab ganan bun, idi age difef bunem, Negur neda Isennadaya nigin ifelnēya anī, tamo meleid bun biya ile di, tamo neid oroya anī bun dinouf.

**11** Negur nē wau ifenēya, isennēya irou isidig anī, tamo ganan bun isin.

**12** Anim, Negur nē tobununā dō fiya sā ado tenebur nē oroya sane bun, “Bai” yeya nigin ifelnadadig, agef fen, ada dug nigin biya kulatun ibodōya, madur ibodōya ado, Negur nē oroya bun, gama sain enei bun ibodōya nigin, ifelnadadig,

**13** agef mā, ada el fiya nē wauda iseya, are neda Negur odug ado Isennadaya, Jesus Kristus ī, fula fiya medeīya ado isiyouf anī tarī tafouf,

**14** Jesus Kristus ī yogo luwa ada nigin itoron, are ī sesen ganan bun tamal yalelnada fen, ī yogo nigin yogon tamo kayau bagai kulo fele di, idi ereb biya age difouf nigin kabī totol dalouf nigin, ī age fen.

**15** Ereb ereb enei ō ufelnēdiyouf. Ogon totol ganan bunem, idi neid waud wales fen, wedereid urou. To loloum weid len, ō lai diyōf.

### 3

*Ereb Biya Anī Dōf Age Fouf*

<sup>1</sup> Tamo kayau wedereid fokō wo, are idi lo fiya ado yeneid adodo tamo karī difediyouf, to didodōf, idi biya age difouf nigin ololo difouf,

<sup>2</sup> taka to bouwa bun od dūf, wau inosiya ado waud difenēdiyouf, tamo ganan bun dimatkesiyouf nigin ago.

<sup>3</sup> Adag kulu kisi neneya adon, tadodon, didegnadan, tenebur nē oroya fire fire ado bouwa nē oroya fire fire nē ferfer tabodon. Ada tobonunā sesen ado kiyēi bun tabodon, to dileda orodin, adag taileid to orodan.

<sup>4</sup> Anī ere, Negur neda Isennadaya nē tobonunā biya ado wau laa fiya wō ye fen,

<sup>5</sup> ī isennadan, are ada ereb madur age tafen anī bunem sā, are yogon wau yūya bunem. ī mata wōya nē naan kulo fiya bunem ado, Awa Uur Fateulem mata falei fiya bunem isennadan.

<sup>6</sup> Negur ī, Jesus Kristus neda Isennadaya bunem, Awa Uur Fateul, ada bun kisi feleya bagai foulā fen,

<sup>7</sup> are yogon wau ifenēya bunem madur fadan, anī bunem, ada mata faimud ibodkeleya nē wauda iseya ado fen, in akor anī talouf nigin age fen.

<sup>8</sup> Od enei momoi bagai, anī nigin, aya, ō enei totol wogō wo di, Negur nigin momoi def anidi karī del fen, ereb biya anī el de age difouf anī orouf. Enei ganan are biya bagai, tamo ganan nigin deuf.

<sup>9</sup> Anī ere, neneya kisi abob fe fiyēya anī, ibor dir fiya, monēya ado, lo nigin luwa irouya anī sese wiyeid, ere nigin, anidi are kaū sā, kabī ifenēya

kisi feleya sā.

<sup>10</sup> Taka ī, ã atun farafef, uruwa bun weder urouwauf, ago fen, babaneg weder urouwauf. Anī bure fele di, ī utornēf.

<sup>11</sup> Ō keleī youf, tamo age fiya are wau gogil fen, mosor bun ilen, ī yogo bouwa sanen inon.

### *Idikeleya Nē Od*

<sup>12</sup> Sain aya õ gein Artemas be Tikikus sur afiyē di, õ Nikopolis an, aya gein kaisā isiya nigin, totol bagai naab umirēf, ere nigin, yau sain bun aya an abodōf nigin kisi anon.

<sup>13</sup> Lo keleī tamo Senas ado Apolos, idi neid naab dilauf nigin, ereb ereb ganan usennēdiyouf, ago di, idi ereb lau fiya sā dilauf.

<sup>14</sup> Neda tamo kayau idig, ereb ereb biya age fiya nigin, idi de keleī anī dalouf bagai, are idi naa ganan nē safina dale fen, kaū sā to dibodōf nigin age difouf.

<sup>15</sup> Ganan aya geid mabodok anidim, õ bun aanya sur mafef. Momoya bun amā nigin waud laa gef anidi aan wiyeid.

Wau ifenēya ã ganan bun ibodōf.

**Mata Ifenēya Nē Od  
The New Testament in the Marik Language of Papua  
New Guinea  
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 18 Mar 2025 from source files  
dated 31 Aug 2023

d7099f9d-3bdf-5620-8eb3-7e6c51cab7ea